



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7

Indrajit Mohanty-i Tripura HC nung chief justice inyaker

Party worker temi Rahul Gandhi Cong tir kümdaktsüner: DK Shivakumar



VOL. XIX NO. 6 (ADOK 6) DIMAPUR

RASEMNÜ (WEDNESDAY) MONGPUTENI (OCTOBER) 13, 2021

₹ 5.00

Cabinet Memoranda mashii mebelenshitsu tuyur

Dimapur, October 12, 2021 (TYO): Cabinet senden nung benoka jembiba onüktem zülubatenbatem- Cabinet Memoranda ya 'secret documents' lir anungji nisung mashii amshitsu makok, ta Chief Secretary J.Alam, IAS-i metetdaksüogo.

Cabinet Memoranda ya Cabinet Cell ajanga sealed cover nung enoker Cabinet Minister aser Advisor tem office ajanga amshir. Ajisüaka, mapang kar nung social media nung Cabinet

Memoranda, Cabinet agenda aser minutes belenshiba ajuruogo. Iba ya Official Secrets Act alema inyakba mapa ka lir, ta Nagaland Chief Secretary-isa metetdaksü.

Cabinet Minister, Advisor aser Head of Administrative Department ajaki bangdak ketdangsurtem dang official e-mail dak alaka social media ajanga Cabinet Memoranda, Cabinet Agenda aser Cabinet Minutes mebelenshitsu tetuyuba agütsüsü metetdaksür, ta J.Alam-isa ashi.

NCSK-i Nagaland Commission tentetsü nenshir

Kohima, October 12, 2021 (TYO): Nagaland sorkari Safai Karamcharis atema State Commission ka tentetsü nungdaker ta National Commission for Safai Karamcharis (NCSK)-i nenshia metetdaksüogo.

Nagaland nung sanitation workers aser manual scavengers (safai karmacharis) nunger khuretem reprangshimtsü atema State Commission ka alitsüla ta parnoki ashi.

National Commission for Safai Karamcharis Chairman, Ma Venkatesan-i Nagaland semdangi arua lir aser tanü pai Kohima Municipal Council office nung safai karmacharis den sensaksema liasü.

Kohima nung Safai Karamcharis-i Self-Employment

Scheme for Rehabilitation of Manual Scavengers (SRMC), Micro Credit Finances aser insurance coverages indang tajangzük magiba atema Venkatesan-i Chief Minister dang State Commission ka tentetsü ashitsu ta nangzük.

Commission-i Chief Minister dang Nagaland nung Safai Karamcharis indang itasen tutsüsü aser housing facilities dena tanga tajangzüktem agütsüsü atema shidi ka zülutsü, ta Venkatesan-isa metetdaksü.

Paisa Safai Karamcharis dang Commission indang portal nung parnoki timtem ajurubatem osang sangoktsüsü ayongzük.

Venkatesan-isa municipality mesüra urban local bodies dang merükmeju mapa inyaker nem osettsüset teperi agütsüsü ashi.

Nagaland state BJP MLA tem Delhi-i ogo

Dimapur, October 12, 2021 (TYO): Deputy Chief Minister aser BLP leader, Y Patton-i anir Nagaland state BJP MLA temi Delhi nung interlocutor A. K Mishra aser NSCN-IM o NNPGs den ajuruteptsü atema apusogo.

Parnokisa Central lenirtem den ajurutepa Naga yimjung olemtep maparen tembangtsü ajungshitsu.

Teloktem kati ka akhümtsübutepa aser temolung agüja olemtep nung ang yimjung bener arutsü ta Nagaland state BJP aser MLA temi amanger, ta

Media Cell Dy. CMO sangdong ka nung ashi.

Prime Minister Narendra Modi aser Union Home Minister Amit Shah nati Naga nunger ajangzüksü atema tebilemstü angatettepnür, ta parnokisa ashi.

Assam Chief Minister, Himanta Biswa Sarma-ia telok balala den ajurutepba atema kanga pelar ta Nagaland state BJP-isa metetdaksü.

BJP president aser Minister Imna Along-i Imphal nungi Delhi nung oa Nagaland state BJP MLA tem ajuruteptsü.

Swachh Survekshan Grameen indang workshop agi

Kohima, October 12, 2021 (TYO): Mongulbarnü Conference hall, PHED directorate nung Swachh Survekshan Grameen (SSG) 2021 indang state level workshop ka agiogo.

Iba sentong nung Secretary PHED Nagaland Kesonyü Yhome-i o jembii.

2018 nungi department of

Drinking Water and Sanitation (DDWS), Ministry of Jal Shakti-i SSG mapa inyaka arur.

2018 nung yimtsüing 7000 shi asadanga liasü aser iba sülen 2019 nung yimtsüing 17,200 aser 2021 nung yimtsüing 17,500 shi kümogo.

Taküm October 25 nungi December 23 tashi nung on-field data collection mapa inyaksü.

Nagaland nung shisaliok mapa shitak meinyaker: Advisor Sukhalu

Kohima, October 12, 2021 (TYO): Nagaland shisaliok tsütsü tayongzükba aika lir aser maparen aika meinyakter saka Nagaland Education Project (NEP) - The Lighthouse NECTAR ajanga temelenshi bener arutsü imlar, ta School Education Advisor, K T Sukhalu-i ashi.

Mongulbarnü Kohima nung NEP- The Lighthouse NECTAR Nagaland: Enhancing Classroom Teaching And Resources (NECTAR) indang sentong nung jembidang pai iba ya metetdaksü.

World Bank-i küm pungu atema teyari agütsüba mapatong nung Rs 500 crore shi lemzüksüogo. Iba ya yaküm April ita nung School Education Department kübok mapatong balaka ama inyaka arur.

Nagaland nung sorkar school 2,000 shi ka lir aser item nung kaketshir 150,000 shi lir, ta Advisor Sukhalu-i ashi.

COVID-19 wara madokdang Nagaland nung tebilemstü liasü.

School tem kaketshir aika maliba aser tangazükba maliba den district tem tsüingda meputep tulu adoka liasü, ta paisa ashi.

Centre-i Unified District Information System for Education (UDISE) 2016-17 data bendenba nung Nagaland ya teküpoktiba jenjang 5 nung dena lir. Ibaji Net Enrolment Rate (NER) national level 85.89% asüba nung Nagaland nungbo 75.63% dang aliba ajangalir, ta paisa metetdaksü.

Nagaland nung primary aser upper-primary levels nung züngtor anener kaketshir aika lir, ta Advisor-isa ashi.

Secondary level nunga Nagaland tatemangtiba jenjang nung lir higher secondary level nung national level 30.95% aliba nungi Nagaland nungbo 19.62% dang lir, ta Sukhalu-isa metetdaksü.

National Achievement Survey (NAS) 10 data ajanga Grades 3, 5, 8, & 10 aser Grades 10 & 12 atema Nagaland Board of School

Education (NBSE) examinations data ajanga sorkar school tem nung junga mangazükba bushiteta lir. Talisa ibaji math aser science nung aser ibajia district tsüingda tebandang tulu lir, ta paisa ashi.

Nagaland nung nija school temi shilem tulu agir. Nija school 717 nung kaketshir 2,20,000 shi azünger, ta Advisor Sukhalu-isa ashi.

Ano, State Board examinations (Grades 10 & 12) nunga sorkar school tem nungi azünger dang nungi nija school nung azüngertemi tajungba takok angur, ta paisa shisem.

"World Bank-i teyari agütsüba NEP- The Lighthouse NECTAR ajanga Nagaland nung education system nung temelenshi tulu bener arutsü, kechiyong iba yagi Nagaland nung aliba school ketdangsubaren ajungkettsü aser tesayuba aser angazükba inyakyim tajungba akümtsü alizüing lir" ta Advisor-i metetdaksü.

COVID-19 Nagaland: 28 taneptsü angu, 19 dak putet & 2 asü

Kohima, October 12, 2021 (TYO): Nagaland nung Mongulbarnü nisung 19 dak COVID-19 putet aser 28 taneptsü angu.

"Tesüiba ghonda 24 tsüingda nisung 19 dak COVID-19 putet. Parnokji Dimapur nung 8, Kohima nung 7, Phek nung 2 aser Tuensang o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 29 taneptsü angu. Parnokji Dimapur nung

16, Kohima nung 6 aser Mokokchung, Phek o Wokha nung anan (2) lir" ta paisa ashi.

Tang nisung 247 anepaludar saka parnok rongnung nisung 177 dakbo shirangba yimya kecha mali, ta Dr Kikon-isa ashi.

Mongulbarnü Kohima aser Phek nung COVID-19 puteta alir nisung kaka asüba züngsema tasür ajak agi 673 kümogo, ta paisa metetdaksü.

"Hombar tashi nung nisung 697,546 nem COVID-19 vaccine indang dose 11,16,227 agütsüogo" ta State

Immunization Officer, Dr Ritu Thurr-ia ashi.

"Vaccine agirtemji frontline workers 60,944, healthcare workers 15,997, arishi küm 45 ser temapur 199,891 aser arishi küm 18 nungi 44 tsüingda alir 420,714 lir" ta paisa ashi.

"Vaccine agirtem rongnungi nisung 418,681-i dose anaprong agiogo. Parnokji frontline workers 47,631, healthcare workers 13,319, arishi küm 45 ser temapur 147,220 aser arishi küm 18 nungi 44 tsüingda alir 210,511 lir" ta Dr Thurr-isa ashi.

Nagaland nung sorkar tesayur itasen atema Rs 1400 crore endoker

Dimapur, October 12, 2021 (TYO): Nagaland nung sorkar tesayur 19,079 lir aser parnok nem itasen agütsüba nung kümshia Rs 1400 crore shi endoker.

Mongulbarnü NEP - The Lighthouse NECTAR sentong nung okila jembidang Special Secretary School Education, Kevileno Angami-i iba osang metetdaksü.

"Kümshia sorkar tesayur 19,079 indang itasen agütsüba nung Rs 1400 crore shi endoker. Sen aika endokba atema asenoki sorkar school tem meyipa reprangshitsu nungdaka akümer" ta Kevileno-i ashi.

"Nagaland nung shisaliokki kidang, tsüki aser arjutem nungi tenzüker aser idakji taintemi lanurtem dang tesayuba balala agütsür" ta Kevileno-i ashi.

Nagaland nung shisaliok ya mezüing sorkar school tem nung tenzüka liasü. Iba mapang jara kitem nung tesayurtem training shitak magii sayu saka parnoki bendanga agütsüba aser sayutsü nangzükba agi nisungtem anitet, ta laisa ashi.

Nagaland nung sorkar school 1953 lir aser item nung pre-primary nungi Class 12 tashi nung kaketshir 1,66,000 shi azünger, ta laisa shisem.

"Nagaland nung sorkar school majungba indang jembir

saka kasa mapang sorkar school aika nung bendanga agütsüba tesayurtemi metokmeperi liaka pei tajungtiba agi sayur. Nagaland nung proxy tesayurtem lir saka kasa mapang bendanga agütsüba tesayur tajungtem-a lir" ta laisa ashi.

Tanurtem nem shisaliokba wadang nung teimla ka bentsür arutsü alizüing yur lighthouse project ya tenzük, ta Special Secretary-isa metetdaksü.

Iba sentong nung Principal Director Shanavas C-i NECTAR project indang lemsatp aser Deputy Project Director Avelu Ruho-i project inyaka aruba metetdaksü.

Rotary Club Kohima ajanga GHS New Market nem teyari agütsü



Rotary Club Kohima indang züngsemtem, Govt. High School New Market, Kohima nung tesayur aser kaketshirtem October 12, 2021 nü school nung sanitary napkins Vending Machine amenoker tangokba noksa ka yangi angur.

Dimapur, Mongputeni/Oct. 12 (TYO): Rotary Club Kohima ajanga October 12, 2021 nü Government High School New Market, Kohima, Nagaland nem sanitary napkin Vendong Machine ka tenla agüja liasü.

Rotary Club Kohima, Rotary International, Dist-3240 indang tir Rtn. Kezhokhoto Savi-i anir iba tenla ya agüja liasü, koba state yimtiba nungbo mezüngbuba alitsü.

Iba machine amenokba sentong tatsüka agiba nung

Club tir Rtn. Kezhokhoto Savi menden liasü, aser pai club indang tongmelang agi rateta shia liasü.

Sentong nung Past President Rtn. Dr. Neisatuo Mero ajanga iba project indang rateta ashi aser Literacy Chair Rtn. Kevin Savino ajanga kaketshir tetsürtem aser tesayurtem dang iba machine nungi sanitary pads agizüksü aser amshir indoktsü yimyatem sayua liasü.

Government High School

New Market, Kohima indang Headmaster-i Rotary Club, Kohima dang iba ama mapa tajung inyaksüba atema pelaba lemsatöp aser iba yagi kaketshir tetsürtem aser parnok tsüraburtem kanga ajangzüksü, ta ashi.

Tang ama COVID-19 tashidak wara agi tesem ajunga sünger nüburtem timtem balala ajurua aliba mapang iba machine nungi sanitary pads angati agütsüba ajanga kaketshir asoshi teyari tulu alitsü, ta pai ashi.

APC Nagaland ajanga Ministry nung ketdangsürtem ajuru



October 12, 2021 nü New Delhi nung APC, Nagaland, Y. Kikheto Sema, IAS -i Addl. Secretary, Vivek Aggarwal, IAS ajuruba noksa nung angur.

Dimapur, Mongputeni/Oct. 12 (TYO): Agriculture Production Commissioner (APC), Nagaland, Y. Kikheto Sema, IAS ajanga October 12, 2021 nü Ministry of Agriculture & Farmers Welfare nung ketdangsürtem kar ajurua state nung aluyimba tsütsü terenlok atema ken o balala jembia liasü.

Sema-i state nung cold storages, pack houses, District Headquarters & jila nung shishilempaba tesem ama post-harvest management infrastructure nungdak, aser itemji ajanga aluyimer, FPOs, entrepreneurs, self-help groups (SHGs) aser Agriculture Infrastructure Fund (AIF) küboki aiterem nem teyari agütsütsü, ta Addl. Secretary, Vivek Aggarwal, IAS dang ashi.

Government of India ajanga AIF kübok senotsü lemzüksüba nungi temsüa alir nem Credit Guarantee coverage küm nung sen tetemlok shilem 3 ashinung temsüa alirtemi sen crore ana tashi abutetsü. Ajisüaka 'mortgage of landed properties' ken o mechi bank temi sen maputsür.

Sema-i Government of India

dang AIF kübok inyakyim ya tashitetba akumtsü aser Bank tem dang aluyimer aser entrepreneurs tem yaritsü totuyuba agüjang ta mepishia liasü, aser iba atema Aggarwal-ia pa tsütsü nungi akok tashi yaritsü ashi aser Sema dang tejangja aser nukla ajetba Entrepreneurs, aluyimer, FPOs tem aser Bank nem tapu meyipa agütsütsü molunga alirtem jangjatetsü ashi.

APC ajangasa Aggarwal dang tekeratiba nung "Digital Agriculture Mission" sanction asütsü mepishi, koba tan ita sa agütsütsü merangtsü, ta Aggarwal-i langzua liasü.

Maneni APC ajanga Addl. Secretary (PMKSY), Prasanta Swain ajurua liasü. Tzü lenmang, tzütu aser channel tem yanglua tzü peria ngutetba ajanga dang chiyongtsü peria ngutetsü, anungji "Other Interventions and Micro Irrigation" kübok Action Plan timba kumdaktsütsü bilemstüla, ta Sema-i Prasanta Swain dang ashi.

Sema-i Jt. Secy (RKVY), Chhavi Jha ajuru aser la dang Department ti aser Mission pezü

ajanga RKVY mapa kuma inyakba indang rasaa ashi aser taküm iba Action Plan timba kumdaktsütsü asoshi bilemdangtsü ajungshia liasü.

Sema-isa la dang "Naga Model of Integrated Settled Farming" (N-ISF) yaritsü mepishia liasü, kechiaser ibai RKVY kübok sustainability aser ecological services atema tongtipang shilem ka lir, kong Business enterprise ama Agri aser Allied Department tem cluster ka nung shilem agitetsü.

Kohima district kübok Boke-Botsa nung model ka mapa kuma inyak tenzükogo, ta pai ashi.

Iba Model yagi Morth-East kisüng masü saka linük nung tenem aliba state tem mezüka inyaktetsü, ta Sema-i ashi.

Paisa Rajbir Singh, Jt. Secy. (MIDH) ajuru aser India nung tanüngba state tem dang nungi Nagaland aser North-East nung tenem aliba region nung MIDH kübok cost norms timba kumdaktsütsü mepishia liasü.

Sema-i Jt. Secy. (Crops and Oil Seeds), Subba Thakur aser Jt. Secy. (INM), Priya Ranjan ajuru aser Union Government ajanga district 12 prong nem Soil Testing laboratory (STL) agütsüba aser state kübok block 74 prong nem Mini laboratory agütsüba atema pelaba lemsatöp liasü.

MOVCD ajanga Block level ajanga nembo organic certification magütsüteter asünung, state nung Organic Certification Agency ka amenokba ajanga aluyimer yaritsü, koba Soil Health Management programme kübok STL, Quality Control Labs, micronutrients & biofertilizer production units aser treatment of Acidic soil amala ki-o-jen aser osettsüset ajak lir, ta Sema-isa ashi.

DDCF-i Hindu nunger den Durga Puja benjong salem lemsatöp

Dimapur, Mongputeni/Oct. 12 (TYO): Dimapur District Citizens' Forum (DDCF) ajanga sangdong ka nung Nagaland nung aliba Hindu nunger aser talisa Dimapur nung aliba Hindu nunger den tepela Durga Puja aser Dussehra benjong salem lemsatöp liasü.

DDCF ajanga benjongmung atema tajungtiba moatsüba mapang ano benjong nung adeni aortem dang tashidak wara ano mesüshi ta temolung nung teti ayutsü aser akok tashi tzü-mopung memeneni iba benjong amungtsü ajungshir, ta sangdong ajangasa ashi.

Mkg nung 'unorganized worker' atema senden amen



Dimapur, Mongputeni/Oct. 12 (TYO): Central sorkari totuyuba agütsüba ama Deputy Commissioner, Mokokchung, Limawabang Jamir, shiba District Level Implementation Committee nung mendenpuba lir, pai district nung 'unorganized worker' tali jangjashia aser tenüng zülüokba maparen tenzüksü atema senden ka ayongzuka liasü.

Iba senden ya ADC Planning Hall, Mokokchung nung October 12, 2021 nü mena liasü.

Linük nung unorganized worker nung ajemdaker national data ka yanglutsü asoshi

Central sorkari e-Shram Portal yangluba indang iba senden nung jembia liasü.

District nung unorganized worker tenüng zülüoktsü atema tasa balala yanglutsü, line department ajanga unorganized worker indang sub-group lemsatsü, jila aser yimtsüng sasep aser ano unorganized worker adenshia aliba tesemtem nung registration camp alitsü atema iba senden nung jembia tasa yanglua liasü.

Iba senden nung Project Officer, Office of the Labour Commissioner Kohima, T. Chubayanger ajanga PowerPoint presentation agüja liasü.

Noklak DPDB senden menogo

Dimapur, Mongputeni/Oct. 12 (TYO): Noklak District Planning & Development Board pur October ita atema senden October 12, 2021 nü Deputy Commissioner, Noklak indang Conference Hall nung Vice Chairman DPDB & Deputy Commissioner, Noklak, Hiazu Meru mendenpuba sür mena liasü.

Iba senden nung züngsemtemi DPDB Noklak ajanga yimtsüngtem adopt asütsü indang jembia aser Noklak assembly constituency kübok Wansoi yimtsüng aser Thonoknyu assembly constituency kübok Thonoknyu yimtsüng ya DPDB village ka ama kumdaktsütsü pangjema liasü.

Iba dak sendakba nung Deputy Commissioner ajanga department balala dang pei akokba lenmang nung yariteptsü ajungshia liasü. DC Meru ajangasa DPDB kübok Noklak jila nung tang mapa teinyakdak indang osang lemsatöp liasü, koba taoba mapang adopt süa liasü.

District nung handicraft temaba jenjangi ajungkettsü mechi Noklak HQ nung handicraft festival ayongzüksü, ta iba senden nung renem. District nung iba amala teka mapa inyaker aika lir asünung, parnok nem maongka agütsütsü

aser sabang lapoktsütsü atema benjong ya ayongzüksü tim, ta ajiteta liasü.

Thonoknyu aspirational block atema iba senden nung Thonoknyu HQ nung rest house yanglutsü, Thonoknyu jila telungzük nung Soiling & metalling (carpeting) aotsü, Pang nungi Chiphur yimtsüng tashi lenmang yanglutsü aser Pangking nung tzü mesüba lenmang yanglutsü agizük aser department balala nem iba mapa nungloktsü.

Senden nung GHSS Noklak nung Science Stream amenoktsü aser GHS Panso nung tebur aser tetsür atema hostel yanglutsü agizüka department dangi yoktsü lemtet.

NH-202, Chendang/Saddle nungi Noklak aser Pansha ajanga NH-702(B), Tobu tashi National Highway tasen sangdongtsü atema iba senden nung jembia agizük aser department dangi abentsü renem.

NSACS den inter-department meeting alitsü atema senden nung jembia aser iba atema anogo lateter metetdaksütsü lemteta liasü.

Board nung züngsem tasen, District Project Officer, Land Resources Department, Lichamo Murry aser SDPO, Shangthing Khaim metetbelaba mapanga agia liasü.

Assam Rifles-i Mizoram nung bicycle rally & cleanliness drive ayongzük



Assam Rifles-i Mizoram kübok Aizawl nung bicycle rally tenzüksüba noksa nung angur.

Aizawl, October 12, 2021 (Agencies): Assam Rifles-i Mizoram kübok Aizawl nung bicycle rally aser Champhai nung cleanliness drive ayonga agiogo. Aizawl nung 'Azadi ka Amrit Mahotsav' tenzuka Aizawl Battalion-i bicycle rally ka ayongzuka agi. Iba bicycle rally nung Aizawl nung lanur 10-i shilem agi. "Lanurtem dang temang

shitak ayutsü aser exercise agitsü osang sangoktsütsü atema rally ayongzük" ta Assam Rifles-i sangdong ka nung metetdaksü. "Aizawl nung alirtemi kanga pela aser Assam Rifles-i iba sentong ayonga agiba atema pelaba metetdaksü" ta HQ IGAR (East)-isa ashi. HQ IGAR (East)-i 'Winning Hearts and Minds' nung

ajemdaker Champhai nung 'cleanliness drive' ka ayonga inyak. Serchhip Battalion-i COVID19 wara mapang nung nübortem nem teyari agüja iba mapa inyak. Iba sentong ya Swachh Bharat Mission ajungkettsü aser iba nübortem dang pei temeket merükmeja ayutsü osang sangoktsütsü alizüng yur inyak.

Indrajit Mohanty-i Tripura HC nung chief justice inyaker

Agartala, October 12, 2021 (Agencies): Mongulbarnü Justice Indrajit Mohanty-i Tripura High Court nung chief justice inyaksü tezüngzüktep agiogo. Agartala, Tripura nung aliba Raj Bhawan nung Justice Indrajit Mohanty-i tezüngzüktep agi. Tripura Governor Satyadev Narayan Arya-i justice

Mohanty nem tezüngzüktep agidaksü. Iba sentong nung Tripura chief minister Biplab Deb, deputy CM Jishnu Dev Varma, union minister Pratima Bhowmik aser minister tem aden. Justice Mohanty ya Rajasthan High Court nungi mapa belenba liasü. Pai taoba Tripura HC chief justice AA

Kureshi melenzüker. Tripura nung 2013 küm high court balaka tentetba sülen Justice Mohanty ya chief justice trokbuba lir. Külen, justice AA Kureshi ya India nung high court judge tejentem rongnung ka lir saka pa Supreme Court-i ano majungketer. Pa Rajasthan High Court nung inyaksü mapa belenogo.

Durga Puja mapang electricity peria agütsütsü: APDCL

Guwahati, October 12, 2021 (Agencies): Assam Power Distribution Company Limited (APDCL)-i Durga Puja mapang electricity shitak agütsütsü ta metetdaksüogo. "APDCL-i NEEPCO Kameng HEP nungi 180 MW power talila agitsü renemogo aser benjung mapang power supply shitak agütsütsü" ta

APDCL-i sangdong ka nung ashi. Thermal power plants nung coal supply peria manguba ajanga Assam nung power tebilemstü tulu adoktsü ta imlaa liasü. "Assam nung coal ajanga power adokba kangabo magir aser iba jagi timtem kangabo majurutsü" ta

APDCL-i ashi. Hombarnü APDCL-i Assam nung power tensa kanga majung lir ta sangdong ka agüja liasü. "Asüng nungi NTPC Bongaigaon-i 100 MW talila agütsütsü nangzükogo. Tanü nungi 50 MW talila agütsür" ta APDCL-i Mongulbarnü metetdaksü

More-i Meghalaya HC nung chief justice inyaksü atema tezüngzüktep agi

Shillong, October 12, 2021 (Agencies): Mongulbarnü Ranjit Vasantrao More-i Meghalaya High Court nung chief justice inyaksü tezüngzüktep agiogo. Raj Bhawan nung Meghalaya Governor Satya Pal Malik-i Justice More nem

tezüngzüktep agidaksü. Meghalaya Governor Satya Pal Malik administer the oath to justice More at Raj Bhawan in Shillong. Iba sentong nung Meghalaya chief minister Conrad Sangma-i anir tongtipang lenirtem aden. Justice More ya

Maharashtra kübok Satara district nung November 4, 1959 nung aso. September 8, 2006 nung pa Bombay High Court nung Judge inyaksü ajungket. Iba sülen March 9, 2020 nü pai Meghalaya High Court nung Judge inyaksü tenzuka liasü.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Althjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajijsüaka, tang Kabiraj H. Umar Chesam contact no. 8416087414 / 6909717178 National awarded H. Umar Chesam
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM
 Yours sincerely - Sabu, Add: Kohima

ONGPANGKONG KAKETSHIR MUNG DANG (OKM)

Tetsü Oshi Wazuka Ayuba Mapatong (2021-2024)
Omen: "Tetsü Oshi Tali Senputi"

Kongshir aser Masem Ken Tentep (Online)
Kongshir Ken: Class 5-8 aser Masem Ken: Class 9-12

Kongshir aser Masem Ken tentepba nung takoker nem Mulungnen Kuli (Certificate) den senpet (prize) yamai alitsü
1st - Rs. 5000/- aser 2nd - Rs. 3000/-

Media Partners
 Ao Milen, Lenjeter, Tir Yimyim

Iba tetoktepeba nung Ongpangkong Kaketshitem yimti/jila/yimtsung balala nung alirtemi shilem agitsü lapoka yutsür aser tejangrartemi 4th Dec 2021 tashi nung tenung agütsütsü metetdaksür. Tejangrartemi osang tejangja yangi agiteptsü akok (Takotiba Jamir, Education Secy. OKM #8837233899)

Centre-i Gauhati High Court atema judge 8 shimer

Guwahati, October 12, 2021 (Agencies): Centre-i Gauhati aser Allahabad High Court tem nung high court judge metsütsü (20) aser Madras High Court nung pezü shimtsü tetuyuba agütsüogo. "Constitution nung tashi agüja aliba ama President-i Chief Justice of India den asüngdangteper high court tem nung advocates aser judicial officers shimtsü molunga agizükogo" ta Department of

Justice-i ashi. Gauhati High Court atema advocate tem- Kakheto Sema, Devashis Baruah, Arun Dev Choudhury aser judicial officers Malasri Nandi o Marli Vankung nung shimer. Gauhati High Court nungsa additional judge asem- Soumitra Saikia, Parthivjyoti Saikia, aser S. Hukato Swu nungertemi judge inyaksü atema shimogo ta Department of Justice-i metetdaksü.

Manipur nung nisung 6 yiru

Imphal, October 12, 2021 (Agencies): Manipur kübok Andro Assembly Constituency nung political party telok ana tsungda mangatettep adoka raratepdang nisung 6 yiru. Iba ya Yairipok Yambem nung atalok aser injang khadokdang tetsür ka dena nisung 6 yiru. By-election nung tokteptsü aliba candidate ana- L Sanjoy aser Th Shyamkumar na pusemer tsungda mangatettepji

adok. Taoba Minister Thounaojam Shyamkumar-i Yairipok Yambem nung senden ka nung adentsü atema aodang L Sanjoy pusemer kari Yairipok Yambem nung rally ka ayonga agi. Idangji parnok tsungda mangatettep adok aser injang khatok. Iba osang angashili police telok ka tesem tonga oa tensa azüoka liasü.

Arunachal nung NSCN telungpur 5 temai adok

Dibrugarh, October 12, 2021 (Agencies): Arunachal Pradesh kübok Tirap district nung National Socialist Council of Nagaland (NSCN) telok balala ana nungi züngsem 5 temai adokogo. NSCN (K-YA) aser NSCN (IM) züngsemtemi Tirap district additional deputy commissioner (ADC), police aser 6th Assam Rifles tsungdang temai adoka liasü. Temai adoker rongnung NSCN (K-YA) nung lance corporal Goliam Gangsa (36)

dena lir. Gangsa ya 2008 küm telungpur aküm aser pai .32 mm pistol ka den .32 mm injang aser .32 mm magazine ka bener arua agütsü. Temai adokertem rongnung NSCN (K-YA) corporal Wangjah Wangsu aser NSCN (K-YA) lance corporal Khuadan Wangsu na dena lir. Tanüngba anaji NSCN (IM) corporal Chaifut Pansa aser NSCN (IM) sergeant major Thiamlang Tesia na lir.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND:: KOHIMA.

No.DHFW-5/D.Pharm/Part-II/2014/6500-01 **Dated, Kohima, the 11thOct.2021**

ADVERTISEMENT

In Pursuance to Govt.approval no. HFW-39/B-1/PHARM/2015 dated Kohima the 1stOct.2021 invites interested local candidates to undergo 2(two) years Diploma in Pharmacy course for the academic session 2021-22 at Regional Institute of Pharmaceutical Science and Technology (RIPSAT), Tripura.The last date for submission of application form online is 18th Oct 2021. Short listing criteria and other details are as follows:

1. 5 (Five) Nos. of Seats available.
2. Applicant should have cleared HSSLC (10+2) in Science Stream with minimum 45% in case of SC/ST candidates (Physics/ Chemistry/ Biology/Mathematics).
3. All relevant documents: HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.
4. The maximum age limit is 25 years on or before 1stSeptember 2021.
5. Application Form can be downloaded from the Department website: nagahealth.nagaland.gov.in
6. Last date of submission of Application forms online will be 18th Oct 2021. Duly filled in application in PDF Format along with requisite supporting documents should be submitted through Email to: hfw.recruitment2020@gmail.com
7. Selection will be done based on Academic Merit Marks.

Sd/-
(DR.NEIKHRIELIE KHIMIAO)
Principal Director
Health & Family Welfare, Nagaland, Kohima

Issued by DIPR



TIR YIMYIM

YIMOBILEM (EDITORIAL)

DIMAPUR RASEMNÜ, MONGPUTENI(OCTOBER) 13, 2021

Tenük meremtsüka!

Asenokbo küm shia o agibo, tangsa Medical College kabo lapoktsü amai jembir saka küm 60 tain Nagaland state otsü nung tang tashi Medical College ka ta melapoktet kazü dang, asen kidanger Assam nungbo joko Medical College 8 buba lapoker ta angashidang ma ta tenükmerema adoker. Aji oda, maka dang meshitepa amshitsüba nungdak oset ka asünungbo, küm ka ana asoshi danga apua linütsüka bilemer. Kasa center government kübok kasa state government saka tangar state ka nung medical college ti tashi lapokdang asenok 2014 küm nungi tenzüka medical college ki ka merenemetet ajokshiba mapa ya Assam nung dangbo ashitsüla masü, taaktsüka lir. Atangji, menur süka asenoka sen crore 200 shi endoka medical college ka lapoktsü atema Kohima district nung kibo yanglu tenzüko aser ano yakta Mon district nunga ka tenzüksü. Ajisüaka, asenok jakla memelenshi nungbo ano sen crore 200 jenjangji sen crore meyrirang junga endoka ano küm ter shi ajokshia amshir merenemetet ayutsüa akok. Hindustan lima nung asenok taküm kuli ya tesüngmangtsüka, tangar todi agir cycle rickshaw nung senzua nübortem asoshi terenlok mapa inyaktsür saka asenokbo necktie agir gari tajung nung mener mapa tilakata merenemetet kümsa küm estimate dang revise süa amonger. Aji oda, nübortem asoshi tenzüka mapabo matem saka pei asoshi yangluba mapatemang atem ta Nagaland nung ajak ajangzüksüba inti meyong tagitarutsü mapatem aika menendokba asenoki angur. Joko, Assam nungbo sangküm nungi Medical College tasenba, Lakhimpur Medical College aser Hospital nung medical zünger lanur 100 bo MBBS züngtettsü. Ibaji zünga Assam nung MBBS seat 1100 kümogo. Tetezü, Assam nungi küm shia medical doctor inyaktsüsa lanur 1100 renemettsü. Iba yimobilem ya züludang, Nagaland nunga Kohima nung Naga Hospital ya, Dimapur nung District Hospital ya aser Mokochung nunga Imkongliba Memorial District Hospital ya Medical College akümtsüsa kiojen aser inyakertem agi peria yutetlasang, item mozü ki jagi melamelaa medical college kümer lila ta temulung rongka bilemer. Asenoki aiben jenjang dalang agi taneptsü angudak mozü ki tajung nungdakba indang jembir, ajisüaka asen lima nung sen meindoki MBBS azüngtsüsa medical college maka tashi jenjang dalang agi taneptsü angutsüsa mozü ki melapoktettsü. Tang Naga nung kar medical doctor akümtsüsa züngtetba ya tanga state nung oagi center government-i Nagaland atema medical azüngtsü atema medical college kar nung menden shiteta yutsüba ajanga züngtetter. Ashi, peisasa medical azüngtsüabajibo Naga nung aikati makoktsü aser akokyonga züngtemer aruagi jenjang dalang agi mozü ki lapoka nübortem yaritsüba tasak asütsü. Asenoki aiben asen lima nung Impur ama nung tang aliba mozü ki ya tuluba aser jenjang temaba nung ajungketa lapoktsü nungdakba indang jembir, aser aji nungdaker. Ajisüaka, iba mozü kidangji sen atema masü saka temeim agi shirangertem yaritsü tangatetba aser temulungtetba nung aruagi doctor mapa inyakertem melira, asenoki doctor ka ita sena magütsütettsü. Item ajakji asen lima nung medical college makaba agi sen meindoki zünger sen atema masü, nübortem yaritsü asoshi inyaktsüsa medical azünger nisung peria mangur. Ashi, tang Assam nung tesüsa National Medical Commission-i Lakhimpur nung Medical College ka nung küm shia nisung 100 medical züngtettsüsa lapoktsü melaba amato, Nagaland nunga küm shia nisung 100 danga medical züngtettsüsa medical college ka danga lapoktet nungbo, küm 5 nungbo Naga nung medical züngtetter noklang pezü pungo kabo kümer alitsü. Nagaland asoshi doctor noklang pungboji aika asütsü. Item jagi mozü aika nung jenjang dalang agi taneptsü agütsütettsü. Item medical doctortem-ji bendang limai medicak missionary kümer aotsü. Joko, asenok ya asen kisüng akatsü aser agitsü bilemba shisatsü ya endoktsüla, kechiyong asen kija bendenba agi, tangar masü, asensa takoksaba akoksar. Asen kisüng agitsü bendena yur kidang kibong nung tanur ajak taküm raksaba purtemji, tangar masü, asenok lir. Ashi, ajak atema inti ajungtsü inyak asübo asen tanurtema ajak asoshi inyaktsüsa tajung kümla. Joko, asen jakdang asen kidanger state-temi, tenük meremtsüka, terenlok mapa manger sangwa nung ali telong agi tema küma inyaka sayuba yagi asenoka melenshir, asen lima aser asen nübor ajungtsü bilema inyakdi.

OLEMSABANG

Tanü tensa mapang nung tashitemeteterteri asen Ao oshi tamentakdak tera (roots) ya kanga tongtibang ta angatet nungbo, asen Ao oshi ya takar oshi rongnung ka ta meteta akümtsü.

~ R. Imkong Lkr, Mangimen.

(Yashi adok nungi...)

2. JOKA: Yangi ano joka indang ya angatetsü merangdi, joka ojang yabo Hindi oshi lir, iba ojang dang English oshi agi kitchen ta ajar. Tatishtisü agi kibong kar indang joka yanglutang yamaisa jembia angazüker, oku, mesüra anükla naa azünga ali nungbo asüng ozü joka yanglushidak mongang no ta ashir, yamaji joka ojang ya asen oshi amaisa jembia angazüker. Saka asen Ao oshi shidakba jembidi ta asü nungbo Atepzüng ta ajar, anungji tang nungibo ozü Atepzüng yanglushidak mongang no ta amshidi mesüra jembidi.

3. HAJERA WALLA: Asenok aikati hajera walla ojang ya asen Ao oshi kümdakja amshir mesüra ajar, saka iba ojang yaa Hindi oshi lir, anungji Hajera walla ojang yagia oren ka yangludangdi. Anükla mesüra okula naa asünya Hajera aotsü maotsü? Ta asen oshi kümdaktsür jembiasa angashir, yamaji oda odabo tanü lanurtemibo iba ojang "Hajera walla" ya asen oshi jembir ta ashitsü akok, anungji kangabo memenutangyongi asen Ao oshi takar o amshia "Ayangi aotsü maotsü ta jembidi" aser yimya sübadi arungma.

Yangi ano adianu L. Kika Pongeneri Tir Yimyim olemsabang nung olen ka zuluba dt. 27.8.21 anogo nung yamai zulua angur, sürabangla asen leniri toktsüba Chief Secretary menden nungji amentsüsa tatongdak Aotsür-Aor lir mali? ta asüngdanga zuluba angur. Iba ojang tatongdak ya aikati junga mangatetsü südi ta nibo bilemer, anungji iba ojang tatongdak melenaji potang ta amshi nung tapetba asütsü. Iba potang ojang tetezüji tarensen nung tanapuba dang ajar, yamaji asen Aor sobaliba yimsüsüba menden nung mesüra office amala nung shiba tanapuba menden nung mena lidir pa mesüra la jagiang temaba mendenji melentsü akok. Aji oda, asenok yimsüsüba menden nunga mezüngpubaji tazüng "samen" menden ya lir, aser tanapuba, tasempuba ta tarensena lua lir, iba ama menden tarensen tangji "potang" ta ajar. Yamaji Chief Secretary menden "tatongdak" ta mamshie potang ta amshi nung mesüra aja nung tajungba mesüra tapetba asütsü ta shisemer.

Aser ano asenok Aortem aikati paper nung zuludang "tebur" "male" ta zuluba angur, ibaia tera mabensa ta nibo bilemer, iba melenaji ola adokba amaji "tebour" ta olasü shidakbaji adoka ajatsüla mesüra zulutsüla.

Aser ano Aortem rongnung Junglir aser Mongsener temeyoktep alir asünungji aikati ojang nungja tetezütem jung mangateti tetsür kesa tarensen telok dang zünger ta ajaba angashia arudagi, saka shidakba agibo iba ojang nungja "zünga" ya kümsem "küm asem" kasa tebour telok dang tang ajar ta angatetsüla, saka tetsür telok dangbo "yangyur" ta ajar. Yamaji asen detsü tebou mapang nungi "tetsü tepong" tetezü tetsür aser tebour na bentet benteta jaa aru. Yamaji asen Aortem Moatsü mong aser Tsüngrem mong benjong amongba mapang nung yangyu aser zünga ya kechisarina nung toktepa "competition" liasa mongasa aru.

Item yangyu aser zünga nungja yaa tetezü tulu aketba nungjatempa lir. Yangi asenoki angatetsüba olen kaji tetsür aser tebour anaprongla tang zünger ta mebendangi ajakba jagi tanü amai lanurtem rongnung teraksa teti alitsü ta anagatetsüla, tetezü "atsüabong" bentet benteta alitsüla ta shinüba o. Aser ano yamajisa tetsür danga adianutsür aser ano tebour danga adianu ta ajar, anajia tebendang kangabo madoker, kechiba ta süra, kodang asenoki adianu dakji "tsü" bendenlokdir (+) tebour agi tetsür akümba ta sayur ta angatetsüla. Saka asen detsü tebou mapang nungi tetsür dangbo "Ayanu" ta bentet benteta jaa aru.

Tanü mapang ya lanurtem rongnung tashitemeteter jenti adoka aliba ajanga asen Ao oshi ya tangar tashitemeteter den medemdanga "grammar" "otang olen" amshia anidaka aobajia junger ko, saka kasa mapang nungj itashitemeteterteri asen Ao oshi ya terara melenshityonga aotang asen Ao oshi tera "roots" tamentakdakji raksatsür ta kelen nungibo angatetsüla. Yamaji asen detsü tebou mapang nungi jembia aruba tejen oshitem aika lir, itemji melenshityütsüsa kümra, item teratemji (roots) kanga junga bentet benteta rasaa ashitsüla ajita mesüra yangjia teraksa adoka atemtsü ana nung lir. Yamaji tanü amai onok tambourtemibo kodanga mangashidangba temenünüsü ojangtem aika enoka amshiba angudang kanga süngmanga bilemer. Tatishtisü agi Hopta nungjatempa aser ita nungjatempa ya onok tambourtemi aser tantsürtemi balaka junga manitakteter ta metetsüla. Yamaji asen oshi mesüra tangar oshi asüyongbo joko küm noklang tema jembia aruba ojang nungjatempa tetezü tulu aketba aser taroktem "deep meaning" ya wazüka ayu nungbo asen Ao oshi ya takar oshi ta meteta akümtsü ta lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Burma sepaitemi Chin State nung Khristan IDP Camp mita ao



Myanmar kübok Chin State nung refugee tem Tenla kidang jenoka aliba noksa nung angur.

October 12, 2021: Burmese Army (Tatmadaw)-i Myanmar kübok Khristan nütsüing timba aliba Chin State nung local defense groups anema rara tesashiba tenzüokogo aser iba ya ajanga Khristantem aika asür aser timtemer, ta International Christian Concern (ICC)-i metetdaksü.

October 3, 2021 nüa 10:30 ako meta military council züngsem 25 arua Chin State kübok Mindat nungi jena oa Kyauktaw, Magway Division nung aliba Catholic Tenla kidang

Internally Displaced Persons (IDP) camp nung jenoka alirtem phone mita reprang.

Sepaitem aser ketdangsertem densema military council 20 shi Catholic Tenla kidang aliba IDP camp-i oa Khristan refugees 18 indang phone mita reprang.

Military council züngsemtemi Khristantem indang phone nung Facebook, Messenger, video files aser SMS mita reprang. Khristantem jagi local defense groups den amalitepa inyaka alitsüa akok ta melung melemi

sepaitemi parnok mita ao.

Tang iba IDP camp nung nisung 200 shi jenoka lir, saka refugees timba-timba akümba ajanga Arogoi maneni IDP camp ulushitsü lemtetogo. Tang Kyauktaw jila nung IDP camp trok lir aser item camp nung refugee 2000 dak timba lir.

Military council-isa osettsüset aser chiyungtsü abenba garitem Pakokku nungi Yonal aser Mindat tashi senzüba lenmang mokdangogo, aser ibaji ajanga Khristantem kanga timtemer.

Kangki sayubaji yimsü meyipba temaitsü masü: Madras HC

October 11, 2021: India kübok Tamil Nadu state nung Madras High Court-i, Dalit Hindu tsür kati Khristan ka den kibong akümba mesüra Kangki sayubaji tamangba yimsü meyipba temaitsü masü, anungji iba nungji ajemdaker la indang scheduled caste (SC) certificate agentsü makok, ta metetdaksü.

Madras High Court Madurai bench-isa, pei kidang takdang jara nung Kangki ayuba mesüra Tenla kidangi aobaji pei yimsü toktsüogogo ta züngshitsü makok; kechiyong Khristan ka akümtsü atema tanaben asotsüla, anungji item nungji ajemdaker SC certificate agentsü makok, ta obendang agütsü.

Hindu Pallan nunger Dr. P. Muneeswari-i temepishiba ken o ka benokba angadanga sülen court-i iba obendangi agütsü. Hindu tsürla Khristan ka den kibong akümba aser tanurtema Khristan yimsü nungi anitetba nung ajemdaker 2013 küm Ramanathapuram nung district ketdangsertemi la indang SC certificate agiena liasü.

Dr. Muneeswari-i la indang clinic nung Kangki ka yua aliba nung ajemdaker lai Hindu yimsü toktsür Khristan yimsü

agizükogogo, anungji la joko Hindu tsür SC nungi masü, ta shia district ketdangsertemi la indang SC certificate agiena liasü.

India nung Hindu Dalit nungertem ya akhidang nungi kanga sendoka aruba kin ka lir saka tangbo legal aser linük temzüng nung ajemdaker parnok ya scheduled castes ama züngshia sorkar teyari balala agütsür.

Ajisüaka Hindu yimsü toktsür Khristan mesüra Islam yimsü agizükertembo SC nungi agienba ajanga sokrar mapa aser shisaliok rejutem nung reservation manguba dang masü saka sorkar schemes balala indang teyaria mangur.

September 27, 2021 nü high court-i la nem tangsa SC certificate agüjang, ta metetdaksü.

High Court-isa, iba ya ajanga sorkar ketdangsertem mashimaluba aser linük temzüng alema inyakba kuli sayur, ta metetdaksü.

Tetsürlar tsüraburtem ya Hindu Pallan nungertem lir, ajisüaka la Khristan ka den kibong akümba aser tanurtem Khristan akümba ajanga la temeden agentsü makok, ta court-i ashi.

Madurai courty nung Jesuit lawyer, A Santhanam-i, "Court-

i linük temzüng kümzüka yuogo. Tamangba yimsü balala süaka tanga tamangba yimsü sentongtem nung oa adener, ajisüaka district ketdangsertemi inyakba mapa ya ajanga loktiliba nung timtem adokdaksütsü," ta ashi.

"Hindu nunger densema tanga yimsü amangertemia Christmas aser tanga tongtibang sentongtem nung adenba ni meteta lir. Süra ibaji Khristan yimsü agizükba ama züngshitsü asü?" ta paisa metetdaksü.

India nunger nütsüing shilem 16 bi Scheduled castes nisungtem lir aser parnok timbaka Hindu nunger lir saka karbo Buddhism, Islam aser Khristan yimsü dangi meyipogogo.

Nepal nung wara mapang ICC-i Arogo lenirtem nem teyari agütsü

Washington D.C, October 12 (Agencies): Coronavirus wara agi alima tesem ajaklen kongshi saka iba wara ajanga talisa Khristantem reshikangshiba linüktem nung Arogo lenirtem kanga timtemer, ta International Christian Concern (ICC)-i metetdaksü.

Nepal nunga iba wara ajanga nisung million tasadang shi kongshi aser iba nungjagi nisung 10,000 dak tema süogogo. Nepal nung iba wara

ANOGO ABEN TSÜNGREM DEN

Takok aser tajangzük anguba

"Kechiaser ni asoshi taküm alibaji Khrista, aser tasütsüji tajangzük lir." Filipi 1:21

Tenyar Pauli koba tayongzükba tulu agütsü, iba o ajanga kü taküm nunga, tanela aser shih nung takokba agütsür. Pai ashi, "kechiaser ni asoshi taküm alibaji Khrista, aser tasütsüji tajangzük lir." Pai tajangzük indang jembidang, tazükba nung, tepuokdak nung, mezüngmeshi aser tatalaba, koba ajanga taküm ka samatsür, item madak takoker küma tajangzük angutsü asoshi Khrista den külemi item timtem ajurudang, taremsük nung, temeim nung, yimlibilem, aser ochi jembiba nung, talangka aremsüka Khristai agütsüba tesünep nung, temenen madak takok ngua temeshiba ajangzüksü asoshi asenok ajungshia züluba pa shiti nung angur.

Temeim adianutem, ne taküm nung tatalaba ajurua tejashi agi sünga ali asü? mesüra, mezüngmeshi kar ajuruba ajanga iba tejashi nung ne taküm ani mesüngzükteni ali asü? Arung! Tenyar Paul den külemi item tasüba madak takoker taküm ka asütsü renema, tasütsü metsübuli, saka tajangzük ta shidi.

SARASADEM

Kibuba, nai ni züngok nung nia tangar Khrista nung adianu aser kinunger ka ama agizüksü ni merangtsü. Amen.

DR Congo linük nung Jihadist teloki Khristan 12 tepset

October 12, 2021: Amongnü Democratic Forces (ADF) lir. Congo nung Allied Democratic Human Rights Watch Forces (ADF) kiralongrartem (HRW) osang ajanga ashiba agi, amakba mapang nung Khristan taküm May 6 nungi September 12 asü, ta International Christian Concern (ICC)-i metetdaksü.

"North Kivu province nung Beni territory kübok Mambuo yimdak kiralongrartem jagi ki aika rondoktsü. Tesülen Congo sepaitem (FARDC) arua kiralongrartem den raraba sülen ang kiralongrartemji jenshia liasü," ta osang ka ajanga metetdaksü.

Joko tesüiba küm aika Congo nung kiralongrartemi Djadi-i, "Khristan nütsüing timba kanga timtem agüja arur aser Khristan nütsüing timba aliba linük nung ya kiralongrar telok tamajungtibaji IS den sendaktepa aliba Allied

Christan lenirtem aser Khristantem nem teyari magütsü. Iba ama mapang ka nung ICC-i Nepal nung aliba Arogo tem den longjemer pastor tem aser Arogo lenirtem nem teyari agütsü.

ICC-i chiyungtsü agütsüba den külemi Khristantem ajungshia liasü. Sorkari Khristantem sendokiyonga ICC-i Khristantem melung süngzüksüba den külemi teyari agütsü.

OLONG PAITEP # 5965

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPILEN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 5964 TELANGZÜBA

TIPILEN :		LANGTSÜNGLEN :	
1. Lemsä, 3. Osang, 5. Mezüng,		1. Lamem, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			



NAGALAND LAGISLATIVE ASSEMBLY AGIR :

Speaker : Ajak arutetba atema pelar. Asenok tangbo "Maa" ta ashira mali, "Nung" ta ashira maliji iba session ya tenük mesepshi nung tempangtsü. Tang CM nem mapang agütsür.

CM : Kanga pelar. Ni kechisa inyaktsü shiyonga aotsü, Nenoki matena agizüktsü.

MLA 59 : Clap clap clap clap.

MLA 59 : Clap clap clap clap.

MLA59 : Clap clap clap clap clap.

MLA Alokba : Hon'ble Sir, Taruba election atema sen-otsü koda asütsü? Onokbo kecha maka akoti!

CM : Mapang shitak nung ajia arutsü, ni ashiba dang angaa liang.

MLA 59 : Clap clap clap clap clap.

Lilir : WhatsApp

TANÜBO NAI LANGZÜANG

Q. Koba küm territorial army tentet?
 A. 18 Aug 1948 B. 18 Aug 1958
 C. 18 Aug 1984 D. 18 Aug 1988

(Taruba adok nung onoki langzüksü)

YASHI ADOK TELANGZÜBA : 18

AO OSHI ANGAZÜKDAK:
TANÜ ANGAZÜKTSÜBA OJANG

Lanuwa
 (n) tanur asüba mapang (Childhood)
 * Onok **lanuwa** mapangbo asen lima nung electric light mali asü.

Lao
 (v) nokdaka melitet ali nung ondak (fall down)
 * Oboula tashimait mangmanga **lao**.



Happy Birthday

TENÜNG : ORANEN LONGCHAR (CHUCHUYIMLANG)

Tasoba anogo : 13th October 2020.
 Talidak : Medziphema Town.

Jala Oranenthy Küm ka (1 yr) renteta aniba asoshi asen Teyanglur Tsüngrem tenüng tali asanger. Maneni, la anema aliba taküm den arishi talang moajangma ta sarasademtsür.

- Temeim Oja, Oba & Oya Ajung.



NAI-A YA METETTER MA

TAOBA MAPANG OCTOBER 13 NÜ ATALOKBA KAR:

1213- Battle of Steppes: 'Hugh Pierrepont, Bishop of Liège' aser 'Louis II, Count of Loon' nati Henry I, Duke of Brabant madak takok angu.
 1501 -Maximilian of Austria aser Louis XII of France nati 'Treaty of Trente' sign asü.
 1773 -Astronomer Charles Messier-i 'The Whirlpool Galaxy' ngutet.
 1923 -Angora (Ankara), Turkey indang yimtiba aküm.
 1969 -Soviet indang spacecraft 'Soyuz 8' anüngi khaketa yok.
 1975 -9th Country Music Association Award: John Denver-i takok angu.
 1981 -Tatong Tir, Hosni Mubarak, Egypt indang Tir shim.
 1987 -Costa Rica Tir, Oscar Arias-i Nobel Peace Prize angu.
 1993 -Chemistry atema Kary Mullis & Michael Smith aser Physics atema Russel Hulse & Joseph Taylor nungeri Nobel prize angu.
 2016 -America nunger kentener aser ken zülur, Bob Dylan nem 'Nobel Prize for Literature' agütsü.

SUDOKU # 6006 TELANGZUBA # 6005

	5	2		6			8		7	4	8	9	1	5	2	6	3
				8	7	3		1	2								
3		8	1		2			9									
				7	9	5	2										
5		7					9										
8		9		4	1	7	5										
	6		4		7	8	9										
7	8	4		3				5									
		1		2		6											

OJANG LUTEP # 5551

JANGTAZÜK :

LIBMAA :

AREMAPN :

NGNU :

APAMNG :

OKIND :

ASAMESI :

IKBNYAAJI :

ODKA :

ASHTAMI :

OJANG LUTEP TELANGZÜBA # 5550

MEIMCHIR TSÜNGREM TEMEIM NUNGI PILADAKTSÜTSÜ ATEMA TEMENENI SENTONG BALALA ATONGTETTER

TAN HOPTA ATEMA - KOMA SÜLA ?

Q. Asenok arogotem nung tetsürtem nema sannükla dang masü saka sannükba mapa inyakdaktsü nunga koma süla ?



New Delhi, Oct 12 : Aram Park nung Pakistan nunger kiralongrara Mohd. Ashraf aliba ki aser Delhi Police Special Cell-i pa Laxmi Nagar tesem nung Hombar aonung apuba sülen Patiala House Court-i anir aoba mapang tangokba noksa nung angur.

Tanurtem nem Covaxin agütsütsü melaogo

New Delhi, Mongputeni/October 12 (Agencies): National drugs regulator's subject expert committee-i, coronavirus mesera Covid-19 tashidak nung kümzüksü atema tanur arishi küm 2 nungi 18 tsüingda alirtem nem Bharat Biotech indang Covaxin amshitsü temelaba agütsüogo, ta ken o jangja alirtemi ashi.

Ketdangsür kati ashiba agi, Covaxin yagi taintem dak ama tanurtem nema teyari agütsüba ngutetogo, ajisüaka linük ajunga nung vaccine agütsüba sentong nung iba ya benoktsü atemabotang tashi telemtetba kecha agia mali.

Zydus Healthcare indang ZyCoV-D vaccine jongdak mapang tanurtem nem agütsütsü atema agizükba sülen tang Covaxin agizükogo.

"Company-i benokba data ajanga vaccine ya tanurtem nem agütsütsü atema kecha tetsükdaktsü maliba ngutetogo. Mongintemi iba vaccine ya

tanurtem nem agütsütsü atema temelaba agütsütsü ta bilemer," ta ketdangsür kati ashi.

Taküm küm May ita drugs controller general of India Dr VG Somani-i, Bharat Biotech nem tanur 525 dak parnok indang Covid vaccine tendangba shilem tasembubana nung tendangtsü atema temelaba agütsü. September ita tetendangba tembangba sülen tetendangba data drugs regulator nem October mezüngbuba hopta agütsü. "Ajisüaka iba ya linük ajunga nung Covid-19 vaccine agütsüba sentong nung bendenloktsü mebenoktsü mejangja aser benoktsü süra koba mapang tashi nung aji expert panel-i telemtetba agitsü," ta ketdangsürisa ashi.

Iba sentong ya benokra vaccine ya dose shidak agütsütsü atema pre-filled syringes ajanga agütsütsü, ta pai ashi.

Clinical trials nung shilem

agiba ketdangsürtemi ashiba agi, Covaxin yagi taintem dak ama tanurtem nema teyari agütsüba ngutetogo, koba taintem dak tasembubana tendangba sülen shilem 77.8 liasü.

"Arishi küm 2 nungi 18 tsüingda alirtem dak COVAXIN tendangba data Central Drugs Standard Control Organisation (CDSCO) nem agütsüogo. Arishi küm 2 nungi 6 tsüingda alirtem dak vaccine tendangba rongnung COVAXIN ya mezüngbuba lir. Taintem dak shilem asem küma lemsar tendangba mapang kuli tejangja agütsüba ajanga tanurtem dak tendangtsü atema temelaba angu," ta Bharat Biotech-i sangdong ka ajanga metetdaksü.

Kasa mapang nung WHO (World Health Organisation) mongintem iba hopta ajurutepa jongdak mapang Covaxin amshidaktsü mamshidaktsütsü iba indang telemtetba ka agitsü.

Kejriwal'er kima longkak aitba mapang MP Manoj Tiwari yiru

New Delhi, Mongputeni/October 12 (Agencies): Covid-19 wara pokteter aliba ajanga lokti kanga bulua adenshiba tesemtem nung Chhath Puja mamungtsü atema tenokdangba agütsür aliba anema Mongolbarnü Delhi chief minister Arvind Kejriwal'er ki anasa longkak aitba mapang Bharatiya Janata Party (BJP) Member of Parliament Manoj Tiwari yiru.

Pa Safdarjung Hospital-i anitepa anir ao, kong pa tema süngjema lir ta ashi.

Delhi BJP tir Adesh Gupta densema longkak aiterem kar Tiwari-i anir iba tenokdangba agintsü khanga longkak aitba mapang Delhi police-i longkak aiterem senshidaktsütsü atema tzü khalokja liasü.

Police ketdangsür kati ashiba agi, Delhi Police-i longkak airtem dak tzü

khaloktsüba mapang Tiwari ya barricade kati soket atu aser iba nungjaki tsüka yiru.

Delhi BJP otongdar tongtiba Abhay Verma-i, Tiwari ya barricade nung nokdaka aliba mapang yiru, ajisüaka pa tangbo tajungba lir, ta ashi.

Mongolbarnü longkak aiterem Kejriwal'er ki anasa marudaktsütsü atema par ki temeket nung tenokdangba aika agütsür liasü.



Lakhimpur Kheri, Oct 12 : AICC General Secretary Priyanka Gandhi Vadra-i Mongolbarnü Lakhimpur Kheri nung longkak aitba mapang tepsetba aluyimertem atema tatembangbuba sentong ayongzüka katsüba mapang shilem agiba noksa nung angur.

Party worker temi Rahul Gandhi Cong tir kümdaktsüner: D K Shivakumar

Bengaluru, Mongputeni/October 12 (Agencies): Working committee senden mamen tsüingda Rahul Gandhi nem Congress tir mapa bendaktsütsü atema tenongshiba tali küma aoba mapang ka nung Karnataka unit tir D K Shivakumar-i Mongolbarnü iba ya linük ajunga nungi party worker temi taginüba lir, ta ashi.

"Linük ajunga, Congress worker temi Rahul Gandhi nem iba khurte bendaktsüner. Pai mapa toktsüba mapa nungi onoki pa nongshia arudar. Linük ajunga nungi party worker temi olaji Rahul Gandhi nem party tir mapa bendaktsütsü asoshi lir," ta Shivakumar-i ashi.

Osangbenertem den sensaksemba mapang pai, "Rahul Gandhi-i tanga mapa shilem 90 bo bender, onoki pa nem iba khuret bendaktsüner," ta ashi.

"Congress Working Committee senden ka October 16 nü amentsü lir, anungji iba anogo asoshi ataa lidi," ta paisa shi. Kasa mapang nung ano

party lenir tejen aser taoba Chief Minister Siddaramaiah-ia Hombarnü, Rahul Gandhi nem party tir mapa bendaktsütsüba lemsatepogo.

Party lenirtemi Siddaramaiah nem national jenjang nung shilem ka agütsütsü ta osang adokba dak sendakba nung Shivakumar-i, iba ya lenirtemi telemtetba agitsü aser state unit yongtsü nungbo kecha sensak masem, ta ashi.

"Iba ya party aser party lenir (Siddaramaiah) atema lir aser ni iba ken o nung mejushiner. Ken o aika adokdar saka item ya onok den sensak masem," ta pai ashi. AICC tir Sonia Gandhi-i tawa Siddaramaiah nem national jenjang nung shilem ka agütsü ajisüaka pai magizük ta osang prokshio.

Osangtem tai ta shia Siddaramaiah-i, pa nem iba amala shilem kecha magitsü ta ashi.

KPCC tir-isa, nisung aikati Congress nung adentsü jangrar aser parnoki tanga lenirtem aser local lenirtem den sensaksemadar ta ashi.



Thanamandi, Rajouri tesem nung kiralongrartem den raraba mapang taküm bendanga agütsürtem nem Army ketdangsürtemi tetushi agütsüba noksa nung angur. Junior Commissioned Officer aser sepai pezü tasümgang parnok aliba jilatemi bener aotsü.

Nagmati agi anüngba ya Modi sorkar tai: NCP

Mumbai, Mongputeni/October 12 (Agencies): Nationalist Congress Party (NCP)-i, linük nung tang nagmati (coal) agi anüngba ya Modi-i aniba sorkar dak tai tongloktsüogo. Iba ajanga power plant aika nung supply ajema kümogo.

Osang benertem den sensaksemba mapang NCP otongdar Nawab Malik-i, nagmati agi anüngba ajanga power plant aika inyaksangshi masür. Bandanglen nungi bener aruaka nagmati agi maneni anünger. Iba ajanga foreign exchange-a intoker, ta pai ashi.

UPA sorkar mapang Ato Kilonser Manmohan Singh-i, tarutsü nung linük nung electricity nungdaksü aliba temulungdang yur coal policy ka benok, ta pai ashi.

Ajisüaka iba mapang opposition aliba party BJP-i iba ya ochi mashi ken o ka ta ashi aser ibayongji agintsüsa aküm, ta Maharashtra sorkar kübok minister tejen Malik-i ashi. Iba sülen nagmati atuba tesemtem ya telok kar nem agütsü saka tang tashi nagmati atu metenzük, ta pai ashiba den

nagmati peria lir saka tang tashi atu metenzük, ta NCP leniri ashi.

"Nagmati agi anüngba ya Modi sorkar tai lir," ta pai ashi.

Sorkar data ajanga hopta ka tejakdang nagmati agi anüngba non-pit head plant 64 liasü saka Deobarnü tashi nungbo 70 ajungba sayuogo.

Plant 135 indang coal-stock data ajanga ashiba agi, plant 70 nung nagmati agi kanga anünga lir.

Centre sorkari state meyong Coal India Ltd (CIL) dang Durga Puja mapang power producer tem nem nagmati supply anogo nung 1.55-1.6 million tonnes (MT) agütsütsü aser October 20 nü nungibo anogo nung 1.7 MT agütsütsü tetuyuba agütsüogo.

Coal ministry-i Deobarnü, electricity generating plant tem nungdakba peritsütsü atema linük nung nagmati peria lir ta ashiba den power supply nung tetsükdaktsü adoktsü ta osang prokshiba ya tai lir ta ashi.

Ketdangsürtemi nagmati atuba tesemtem nung tzüinglu aruba ajanga gari senzusenpong majungba agi nagmati agi anünger ta ashi.

Typhoon Kompas agi Philippines nung kongshiogo

Manila, Mongputeni/Oct. 12 (Agencies): Typhoon Kompas agi Philippines nung kongshia tzunglu tesashi aruba sülen tzumetsung aser anentsüh ajanga linük north aser west tsütsü nisung tuko takum sama aser ano nisung 16 samar bushir, ta national disaster agency ajanga ashi.

National Disaster Risk Reduction and Management Council (NDRRMC) ajanga Mongulbarnü sangdong ka nung ashiba agi, Benguet province nung anentsü ka aluba nung nisung pezü asü, linük north tsütsü Cagayan province nung nisung ka tzu nung arakseta asü aser Palawan province nung ajungben tzumetsung adoka nisung pezü pongzüka bener ao.

Province asem nungya nisung 16 samar bushir, ta NDRRMC ajanga ashi. Nisung

ana yirua liasü. Jila aser yimti kar nung tzumetsung adokba den tzunglu kanga sashia arua mopung agi süngtong laoa ki tepsatsüba aser power line raksatsüba sülen nisung 2,000 dak tema pei kidang nungi anizüker ogo, ta yangji aliba osangbener temi ashi.

"Kilentzü aoba lenmang dangbanga aliba mesüra sadema maliba ajanga yimtsung tenet-ti ka tzu agi metsungbanga lir," ta Palawan kübok Puerto Princesa yimti nung disaster ketdangsür Earl Timbancaya-i osangbener dang ashi.

"Ajisüaka tzumetsung tang arema aoba mapang lir."

Benguet nung tenemtsung anenzüka orr alidak sung agi yangluba ki sangzüa aliba noksa tem social media nung prokshia liasü.

Video pa anguba nung tebur aser tetsür telok ka menti lu nung iba tzumetsung timtem agi mokongshidang aritepa menti bendenba nguogo.

Kompasu dang ya Philippines nung Typhoon Maring, ta ajar aser iba yipru tesashi ya linük tonga aruba mapang mopung ya ghonda ka nung kilometre 100 tashi kera aon aser Hombar aonung linük tonga aru.

Philippines ya asetkong 7,600 dak tema agi akumba linük ka lir, kong küm shia yipru mesüra typhoon 20 shi agi kongshia tzunglu tesashi arudaktsür aser anentsüh aludaktsür.

Sorkari iba timtem nung yaritepa maparen Tir Rodrigo Duterte-i mita reprangba mapang lir, ta pa indang odongtar Harry Roques-i Mongulbarnü ashi.



Santee, California nung tayimtsü tilaka tsükokdak mibener temi mi remsepba noksa nung angur. Southern California nung aliba jila ka nung tayimtsü tsükokdang nisung ana asü aser ana yiru, aser ki ana nung mi kaoloka liasü, ta ketdangsürtemi ashi.

Taliban-i EU-US ketdangsürtem den ajurutep

Doha, Mongputeni/Oct. 12 (Agencies): Taliban aser EU-US ketdangsürtem Mongolbarnü Qatar nung ajurutepogo. Alima kin tem teyari agitsü atema Taliban-i merangba mapang tang iba senden menogo. Afghanistan yimsüsürtemi alima kintem nem parnok agizükdaktsütsü atema inyakdar aser iba den humanitarian tsütsü timtem lendong tulu ajurutsü aliba nungi jenbotsü atema teyari aginüa inyaktepdar.

UN telokakba Antonio Guterres-i alima kintem dang Afghanistan rongsenketsung chireper aliba mesotsü atema parnok nem teyari agütsütsü mepeshia metetdaktsüogo, ajisüaka Afghan nung tetsürtem dak sendakba nung parnoki nangzüka ama minyakba atema Taliban aitsüogo.

Doha nung sensaksem ya Qatar-i achayangtsü, kong mapang talangka Taliban political office ka amenoker liasü.

EU otongdar Nabila Massrali-i, iba senden amenba ajanga US aser European union nem parnok tebilemtsü metetdaktsütsü atema maongka agütsütsü, kong Afghan toktsür onertem nem temelaba agütsütsü, humanitarian teyaritem menokdangtsü, tetsürtem akhümtsübuwa amshitsü aser Afghanistan ya kiralongrartem mongjen ka mekümdaktsütsü atema jenjang tapet agitsüba onüktem densema lir, ta ashi.

Taliban pur tang kanga teyari nungdaka lir, kechiyong Afghanistan rongsentetzung kanga mejungi kümogo. Afghanistan nung chiyongtsü jenjang aika akümer aser unemployment timtem tulu adok aliba den international teyaritem ajak sota lir.

Taliba yimsüsüba ya ozung kübok kümetta sorkar ka ta tang tashi linük kati danga agizüka mali aser kasa mapang nung parnok Islamic State-Khorasan (IS-K)-i amokmerena arudar.

"Onoki alima kin ajunga den tesendaktep tajung yuner," ta Taliban indang acting foreign minister Amir Khan Muttaqi-i ashi. "Alima kintem den tesendaktep liromedema ayutsüji kanga tongtibang ta

onoki amanger. Iba amala tesendaktep ajanga Afghanistan anokshia aliba kümzüktü," ta Muttaqi-i ashi. Pa lenisüba nung Taliban ketdangsürtem iba senden nung aden, aser America-i Afghanistan toktsür aoba sülen pai mezüngbuba US ketdangsürtem den sensaksemogo.

Mongolbarnü sensaksem magi tsungda EU foreign policy tekolakba Josep Borrell-i, bloc-i timtem nungi anitetsü nükjidong nung Afghan nungertem nem indang indanga teyari agütsüba ajungkettsü sentong lir, ta ashi.

"Asenoki repranga dang matatetsü. Asenoki takaratiba nung jenjang tapet agitsü nungdaker," ta EU development minister tem den sensak asema sülen Borrell-i ashi.

Taliban yimsüsüba majungketi Afghan nungertem nem teyari agütsütsü atema alimakintem tetsükdaktsü adoker aliba mapang ka lir.

Taliban-i Afghanistan atsungba sülen humanitarian aser security dak sendakba nung sensak asemtsü atema Mongolbarnüsa G20 lenirtem virtual summit ka amentsü liasü, ajisüaka Italy-i ayongba senden nung United States, EU, China, Turkey, Russia aser Saudi Arabia nungeri shilem agitsü magirtsü aji mejangja liasü.

UN tekolakba Guterres-i, tenangzüka agütsür liaka Taliban-i tetsür benshiba yimya dak sendakba nung pa kanga temulung masüba lemsatepogo.

"Taliban puri Afghan nungertem dang nangzüka ama minyakba ngua ni shisabulua bilemer," ta pai Hombar nung osang benertem dang ashi.

Afghanistan nungertem teburtem hopta asem tejakdang secondary school temi aotsü temelaba agütsüogo, ajisüaka tetsürtem aser tetsür tesayurtem linük kübok tesem timba ka nung pei ki toktsür maotsü tetuyuba agütsüogo. Ajisüaka parnok primary school temibo otettsü.

Tetsürtem sentokba indang asungdangba mapang Muttaqi-i, Covid-19 wara poketer aliba ajanga school tem shibanga lir, ta ashi. Muttaqi-isa, Shiite lokti mezüngmeshia mamshir aser IS-K-a azüokogo, ta ashi.

ALL INDIA INSTITUTE OF MEDICAL SCIENCES ANSARI NAGAR, NEW DELHI - 110 608 EXAMINATION SECTION			
ADMISSION NOTICE NO.132/2021			
Ref. No.F.AIIMS/Exam.Sec./Advt./4-5/(INI-CET-PG-JAN-22)/2021		29.09.2021	
Institute of National Importance Combined Entrance Test (INI-CET) for admission to PG Courses for January 2022 session			
All India Institute of Medical Sciences, New Delhi ajanga Institute of National Importance Combined Entrance Test (INI-CET) January 2022 atema [MD/MS/M.Ch.(6years)/ DM(6years)/MDSJ of AIIMS, New Delhi, JIPMER Puducherry, NIMHANS Bengaluru, PGIMER Chandigarh & SCTIMST Trivandrum aser danga ABMS (Bhopal, Bhubaneswar, Jodhpur, Nagpur, Patna, Raipur & Rishikesh etc.) nung PG Course atema tsunglanglen agüja aliba ama online application meshir: -			
Application atema Online Registration		Start date	Closing Date
<ul style="list-style-type: none"> #Registration aser Basic information (Applicants shirnoki taoba mapang apply sür aser shirnok indang Basic Registration AIIMS atema January 2019, July 2019, January 2020, July 2020, January 2021 aser July 2021 session asoshi #AGIZÜKER ali, parnok tanaben Registration aser Basic information menügdak. Parnoki Examination Unique Code (EUC Code) Generate asüba sülen application form ya renemtsü (5:00 pm) Editing of Registration and Basic Information 		10.09.2021 (5:00 pm)	09.10.2021 (by 5:00 pm)
Registration aser Basic information indang status aser reject sür aliba noksa tem tanaben melenshitsü atema tatem anogo		11.10.2021	13.10.2021 (by 5:00 pm)
Accepted Registration aser Basic information Indang Final Status		14.10.2021	(by 5:00 pm)
Eligibility criteria den Sponsored and Foreign National/OCI candidates indang seat position densema Prospectus upload asütsü anogo: 04.10.2021			
<ul style="list-style-type: none"> Generation of Examination Unique Code (EUC) [Accepted Registration aser Basic information pur kisung atema- January 2022 session atema taoba mapang agütsüba EUC code magir] Completion of Application form (EUC code generate sür aliba candidate pur kisung atema) Registration aser Basic information edit asütsü aser Application form renemtsü atema (Registration fee agütsüba sülen Category aser city choice melenshitsü makok) Certificate/Card: SC/ST/OBC(NCL)/EWS/PwBD certificate aser OCI Card tejangja upload asütsü Date(s) of valid OBC(NCL) certificate: 17.10.2020 nungi 20.10.2021 tsungta agütsüba asütsüla (date anaprong densema) Date(s) of valid EWS certificate: EWS certificate ya financial year 2021-2022 atema valid asütsüla <p>Aser 01.04.2021 nung mesüra iba sülen mesüra incoming year 2020-2021 nung ajemdaker "Completion of Application form" indang anogo tatem nü mesüra matemdang</p>		04.10.2021 (05:00 pm)	20.10.2021 (05:00 pm)
Completion of application form indang status reprangba anogo & nungdakba document agütsütsü atema tatem bang anogo.		27.10.2021 (11:00 am)	30.10.2021 (05:00 pm)
Online Registration indang Final Status aser AIIMS website nung admit card upload asütsü		08.11.2021 (Monday)	
Date of Examination	Examination Timings	Examination Centers	
Sunday, 14 th November, 2021	Medical and Dental Courses- 09:00 AM – 12:00 Noon	Cities all over India	
Tongtipang: Prospectus, osang tejangja amala atema imlibelama website www.aiimsexams.ac.in semdangangma. Applicant ajungai website ya teti semdangtsüla, kechiaser iba sülen metongshiba/melenshiba/updates ajunga ya website nung dang upload sütsütsü. Registration aser Basic information ya kechi südir süaka agütsütsüla. Only those with accepted Registration & Basic information agizüker alirtemi dang application form renemtsü atema EUC Generation atema otettsü.			
Melenshiba/ Registration yanglushiba: Registration & Basic candidate information MESÜRA Completion of application form nung melenshitsü nungdakba candidate asoshi, anogo aser mapang lateta aliba ama edit panel angutsü. Yanglushiba ya candidate kisung inyaktetsü ta meteta alitsüla. Melenshitsü ajunga atema candidate khuret asütsü. Editing atema tatem bang anogo i.e. 20.10.2021 nikongdang 05:00 sülenbo makoktsü. Iba dak sendakba nung tarutsü nung osang magütsütsü ta applicants temi meteta alitsüla.			
Note: Applicant shirnokisa fee magütsüi ali, parnok indang application magizüktü aser iba dak sendakba nung osangtsüsang kecha magütsütsü.			

NSLSA-i International Day of the Girl Child mungogo

Dimapur, Mongputeni/ October 12, 2021 (TYO): Pan India Awareness shilem ama, Hombarnü, National Legal Services Authority (NALSA) kübok Nagaland State Legal Services Authority (NSLSA)-i International Day of the Girl Child anogomung nung District Legal Services Authorities kübok sentong balala ayonga agiogo, ta sangdong ajanga metetdaksü.

Longleng : Longleng DLSA-i Sakhi-One Stop Centre, Longleng Police Station, Women Police, Phomla Hoichem nungi teshimtet nübu, LLC teacher incharge aser Longleng ward 11 nungi president tem den International Day of the Girl Child anogomung sentong ayonga agiogo.

Project Assistant LDLSA P Moneyi Phom-i, Constitution kübok tanurtem nem temeden balala agüja aliba aser iba dak sendakba Arrla balala nung ajemdaker jembia liasü. Counsellor Sakhi-OSC Longleng-i, District nung iba Center ajanga agütsüba service tem indang tongmelang agi telok dang metetdaksü. Secretary Longleng DLSA Holika Sukhalu CJM (NJS) Longleng-i, POCSO Act kübok nükjidong tem aser inyakyimtem metetdakja liasü. Iba sentong nung nisung 30 agi shilem agiogo.

Dimapur : Dimapur nung, Childline Nagaland den longjemer Dimapur DLSA-i 'Juvenile Justice Act, POCSO, 2019 Act and Child Rights' omen nung webinar ka ayonga agiogo.

Iba sentong nung, Boduve P Resu, JMFC Dimapur-i, POCSO Act aser Child Rights nung ajemdaker jembia liasü. Sonile Seb, Retainer Lawyer, DDLSA-i Compensation/Government dak sendakba scheme balala telok dang metetdaksü. Susan Lotha, JJB Member, Dimapur-i, integrated child protection scheme kübok statutory support service tem angatetsü aser iba mapatong metetta alitsü asoshi metetdakja liasü. Iba scheme ya Centre Sorkar ajanga teyari agütsüba scheme ka asütsü.

Susan-isa, tanurtem timtem angateta parnok anepalutsü aser

iba maparen nung lokti ajaki angatet shilemagitsü asoshi telok ayongzük. Iba webinar sentong nung nisung 44 agi shilemagiogo.

Phek : Phek nunga, District Task Force Phek, Police Phek, Sakhi-OSC Phek, DLCW-MSK (BBBP) Phek, CWC committee Phek, PTCSU Phek den Phek DLSA longjemer seminar ka ayonga agiogo, kong Phulushe Yephthomi, ADC Phek aser Samuel Ritse, Public Prosecutor Phek nati POSCO Act, 2012 indang tongmelang agi metetdaksü.

PTCSU-i, tanurtem aser tainlonglong tetsürtem atema 'gender equality', 'digital generation' aser scheme balala agüja aliba indang metetdakja liasü. Retainer lawyer, Vethothi Vero-i, Child Rights onük nung ajemdaker jembio. Iba seminar nung, kaketshir 60 dak tema aser colony nungi teshimtet nübutem aruagi denogo.

Kiphire : Kiphire nung, District Child Protection Unit, Kiphire den Kiphire DLSA longjemer DC Conference Hall, Kiphire nung sentong ka ayonga agiogo. Retainer Lawyer DLSA Kiphire, Bentangwati Sangtam-i, Child Rights nung ajemdaker jembio. Iba sentong nung nisung 24 agi shilem agi liasü.

Zunheboto : Kasa anogo, Sakhi One Stop Center, Zunheboto aser Zunheboto DLSA longjemer PHED ground nung Christian Education Department Alahuto, Sema Baptist Church den sentong ka ayonga agiogo. Iba sentong nung shisalen sayurji Easter H Yephthomi, Retainer Lawyer, ZDLSA liasü aser iba sentong nung nisung 200 shi denogo.

Kohima : Kohima nung, Child Welfare Committee, CHILDLINE, Observation Home, Women Police, State Level Social Welfare Department, Distrist Level Centre for Women-MSK, Women Helpline densema Sorkar nungi külem sendaktepa alir den Kohima DLSA longjemer 'International Day of the Girl Child' mungogo.

Iba sentong nung, Nokshei Kano Secretary-i okila jembia aser Advocate cum Panel Lawyer, Mhechiete U Kenye-i, POCSO

Act, 2012 nung ajemdaker jembia liasü, kong lai telok dang iba Act indang nükjidongtem aser inyakyimtem metetdaksü.

Wokha : SMBHS School Wokha Nagaland nung, Wokha DLSA den District Task Force, BBBP, Sakhi One Stop Centre, DLCW-MSK & District Administration longjemer International Day of the Girl Child mungogo. Iba sentong nung, I Yentinoungbou Extra Assistant Commissioner-i okila jembia; POCSO Act nung Panel Lawyer M. Gracy Ezung-i jembia aser Thungbeni Kikon, Case Worker Sakhi-OSC-i 'Case Presentation' agüja liasü. Iba sentong nung, kaketshir 55 agi shilem agiogo.

Mokokchung : International Day of the Girl Child anogomung nungtem nung, Mokokchung District nunga, Mokokchung DLSA den Child Welfare Committee, Mokokchung aser CHILDLINE 1098, Mokokchung longjemer sentong ka ayonga agiogo. Iba sentong ya 'Legal Rights of a Girl Child, scenario of Girl Child in today's society' omen nung ajemdaker agia liasü. Sentong nung agüja aliba omen dak alaka, iba anogomung dak sendakba onük balala nung jembio. Iba sentong nung nisung 30 shi denogo.

Jalukie : Maneni, Jalukie Town nung, Peren District Legal Services Authority ajanga 'International Day of the Girl Child' anogomung mungogo. CWC züngsem, DCPU team aser JJB züngsem tem den longjemer iba sentong agia liasü. Asungbe Hau-i, Juvenile Justice (care and protection) Act 2015 kübok agüja aliba 'tanur temeden' onük balala nung jembia liasü aser tanga Temzüng kübok tanurtem nem temeden balala agüja aliba indang telok dang metetdaksü. Italang Ramlia-i, POCSO Act indang nükjidongtem aser iba Act kübok agüja alibatem nung ajemdaker jembio, ta kasa sangdong nung shia lir.

OFFICE OF THE
DIMAPUR YAONGYIMSEN LONGKÜM SAYIR
ELANGTSÜR TELONGJEM : DIMAPUR, NAGALAND

TENÜNGSANG AGÜTSÜR

Tetso College Dimapur nung 9th Oct.2021 nü Mr. Dimapur 2021 mezüngbuba season sentong nung Wt. Alemla & Wp. Lt. Sangtemjungshi Longkümer jabaso Sp. **Merenzünga Longkümer-i** Mr. Dimapur 2021 tetoktepba nung takok konang tetushi nguteta yimer aser kidong asoshi temoatsü onsara tulu bener arutsüba asoshi pa nem Yaongyimsen aser Dimapur Longkümer Sayir kidong tetsür tepur ajaki tenüngsang tulu agütsür.



Tarutsü anogotem nunga nü taküm wadang ajak nung maneni Tsüngremi takok nung aniang ma ta sarasadema moatsür.

Sd/-
(Mrs. Aosangla Lkr)
F/Secy.

Sd/-
(Mrs. Mayangla Lkr)
G/Secy.

PELAR

"Ni rara tajungji raraogo, ni alizüing tonga asemogo"

Onoki teti dang meima aliba tsürabur Asür **Mr. TAKALEMBA** (Mopungchuket), pa shirangba anogo nungi tasüba anogo tashi shirnokisa ozü den nübu, rongsen, shisatsü aser sarasadem agi mulungsoa yaritepa aruogo, nenok ajak dang senti rongsen dang nungia taoba tepela ozü kibongi lemsateper. Asen Takar Tsüngremi nenok ajak moajang ta ozü sarasadem.



17/08/1935 - 04/10/2021

Temeim Kinungtsü, Chirnur, Semchir, Anükapang

Office of the
Langpangkong Tzükong Mungdang
H.Q. Chuchuyimlang - 798614
Dist. Mokokchung, Nagaland
Estd - 1933

LTM (2021-24 TENURE) mezüng Sanen Luden SENDEN AYONGER

Langpangkong Tzükong Mungdang (LTM) tenure (2021-2024) Mezüng Sanen Luden Senden 16th October 2021 anogo, anepdang 10:00 ako nung Tzükong Salang H.Q. Chuchuyimlang nung akatsü ayonger. Anungji Temzüng Arla XVI(a) nung shia aliba ama Yimtsüng shia Village Cormcil Chairman den nungtet süa nübo ka aser LTM nung sendakloka aliba tentet (Unit) shia Tir den nungtet süa züngsem kaka ta arutsü mepishia metedaksür.

Kanga Pelar,

Tzükong wadang nung,

Sd/-
(MARSANEM IMSONG)
Tir, LTM

Sd/-
(R. NUKSHI LONGKUMER)
Tongti Zülur, LTM.

Dimapur Watsü Telongjem-i metetdaksür

Item tekübok agüja aliba Amitsürtem ya kanga tongtipang nungdak kar alinung Dimapur Watsü Telongjem Treasurer kidangi 16th Oct 2021 Mapang 9:00 AM shidak nung ken arutsü mepishir.

List of Beneficiary of Destitute Women:

S/N	Name of Beneficiary	F/Name	Colony
1.	Mapuenla	Lt.Sünep	Ao Kasharam
2.	Imkongjungla	Lt.Nungtoktoshi	Nahabari
3.	Meyikala	Tinu	Chumu
4.	Imtimongla	T.Chujang	Chumu
5.	Markokla	Bendang	Lhomthi colony
6.	Inyaktola	Chubanokden	Diphubar
7.	Wapangla Aier	Lt.Bendang	Nahabari
8.	Tsuktilemla	Imkongsowa	Nahabari
9.	Imlirena Jamir	Takuyuba Jamir	Duncan
10.	Imtula	Waitsüngba	Aoyimti
11.	Tamongla	Wapang	Oriental
12.	T.Amongla	Imkongliba	Sugar Mill
13.	Atule Longchar	Yarba	Sugar Mill
14.	Amongla	Wati (husband)	Dimapur
15.	Narola		Purana bazaar B
16.	Helen Ao	Temjenkaba	Aoyimti
17.	Temjennungla Ao	Rolland Ao	Padumphueri
18.	Moala	Tekaneken	Eralibill
19.	Tsüpongngungla Longchar	Lt.Akanglemba	Khushiabill
20.	Tiala Jamir	Imjung Jamir	Diphubar Irrigation Colony
21.	Arutle Jamir	Lanu Jamir Husband	Burma camp.

Sd/-
(Wt. Yarsangla)
President, DWT
Ph no : 9436267539

Sd/-
(Wt. Aoinla.Jamr)
Secretary, DWT
Ph no :9856171163



Yimden temzüng nung ajemdaker Ungma yim kübok Aolijen Mepu yimden-i dokantem nungi mapang süir aliba (expired) chiyungtsü aser osettem bendener rungtoxtsü mapang tangokba noksa nung angur. Kiyong yimdeni dokan kiburtem dang yasür iba ama meinyaktsü tekümdangtsü o shia liasü, ta yimsüsür kati iba osangbener den jembidang metetdaksü. Ungma, 9th October, 2021.

21buba NSF Martyrs Memorial Trophy: Chüziema, Berenike aser Viswemi nungeri takok angu



Kohima, Mongputeni/October 12, 2021 (TYO): Mongolbarnü, Indira Gandhi Stadium kübok 21buba NSF Martyrs' Memorial asayamung nung match asem tashi asaya liasü. Item asaya nung Chüziema Football Club, Berenike FC Meriema aser Viswemi FC nungeri takok nguogo.

Mezüng match nung, Chüziema FC aser Kigwema Students Union na asaya liasü. Chüziema-i Kigwema Students Union madak goal 2-1 agi takok nguogo.

Iba asaya nung, Kigwema SU atema Medovito Sale-i mezüng goal idaktsü aser Kigwema pur goal 1-0 agi Chüziema tejakdang ser mezüng half tembang.

Break sülen, tanabuba half

atemtsü lia Chüziema FC atema Kethosilie-i goal ka inoktsü aser Menguzelie-i goal tanabuba inokja liasü.

Tanabuba match nung, Berenike FC Mereima-i Chizama United madak goal 5-3 agi kokogo. Iba asaya nung, Vizotuolie-i Berenike atema mezüng goal idaktsü aser Chizama United atema Khwetelho Thopi-i goal ka idakja telok anaprongla goal 1-1 kumadok.

Ajisüaka, tanabuba half nung, Sinlo Kent-i goal ka inokja Chizama goal 2-1 agi Mereima tejakdang aküm. Vizotuolie-i ano Mereima atema goal tanabuba aser tasembuba idaktsü aser külem asayar Shürhosül Zhotso-i goal ana tashi atonga idakja liasü. Chizami atema Thopi-isa goal

ana bendenloktsü. Iba asayamung nung hat-trick scorer rongnung Thopi asayar tanabuba kümogo, saka par teloki iba asaya mekoktet.

Maneni, tasembuba match nung, Viswemi FC-i Kohima Bible College madak 4-1 agi takok nguogo. Iba asaya nung, Viswemi atema Tejongol Sothu, Kelengol Toso, Zaukhoto Rhetso aser Vilu Theyo nungeri goal ka ka inoktsü; aser Kohima Bible College atema Joygit Basumatary-i goal ka idaktsü.

*** October 13, 2021 atema asaya vamai alitsü:**

1. Billy Graham FC vs Seiyhazou Hill Boys FC @ 11:30 AM
2. Bandits FC Kohima vs Wokha Town Club @ 1:00 PM
3. Asüfü Christian Institute vs Jakhama YO @ 2:30 PM

2022 World Cup atema Germany qualify süogo

Skopje, Mongputeni/October 12, 2021 (Agencies): Hombarnü, Toše Proeski Arena stadium, Skopje kübok World Cup qualifying group J nung Germany aser North Macedonia na asaya liasü. Iba asayamung nung, Germany-i coach tasen Hansi Flick tawabangba kübok maneni shilem tajung agia arudar aser 2022 World Cup atema parnok qualify süogo.

Chelsea nungi striker asayar Timo Werner-i Germany atema goal ana tashi idaktsü aser par teloki 4-0 agi North Macedonia tsükdakja World Cup atema temsüa kümogo. Taoba asaya tanga ka nung, Germany team-i goal 2-1 agi North Macedonia makokba sülen, ita ka lir Skopje nung, Germany-i iba qualifying asaya koka point 8 tashi anguba den, Group J nung temaba jenjang tongtetogo. Iba takok ajanga sangküm Qatar nung football asayamung tongti ka nung shilem agitsü asoshi parnoki jenjang ka ajanzüktet.

Werner den Chelsea nung külemi asayar Kai Havertz-i team atema goal ka aser Jamal Musiala-i mezüng international goal inoktsü. Coach Hansi Flick

kübok, asaya pungo nungi Germany puri asayar pungoprongla takok angur asütsü. Euro 2020 sülen, Joachim Loew melena Germany coach ama Flick anioka liasü.

Arishi küm, 56 tain coach Flick-i ashiba agi, 2014 World Cup takok angur telok - Germany pur ano teinyaktsü aika aser lenla aisü nung melenshitsu lir, saka parnoki alima nung team tajung den tokteptsüa jenjang ka nung lir.

"Asayatem (Germany) dak France, Italy aser Belgium nung den tokteptsüa sempet lir. Parnoki ibaji inyaktetsü ta kü dak teimla lir," ta Flick-i ashi.

Midfielder Leon Goretzka-i iba asayamung mezüng round ana nung junga shilem magitetba sülen, Germany pur World Cup atema qualify asütsü mechi, Flick asalentong nung pai nungitta asayaogo.

Iba asaya mezüng half tashi nung, Germany puri goal inoktsütsü maongka aika tepdok, kong striker Werner-i goal kar metsüdok aser Joshua Kimmich o Serge Gnabry nati metsülöktsüba goal ana tashi North Macedonian goalkeeper

Stole Dimitrievski-i nokdanga liasü.

Telok kati danga goal meinoktsüteti mezüng half tembangba sülen, tanabuba half nung, Germany puri ano goal idaktsütsü maongka tajung kar angu, kong minute 50buba nung, Havertz-i mezüng goal inokja liasü.

Werner-i minute 73buba nung Germany atema goal tasembuba meinoktsüdang, minute 3 tejakdang pai team atema goal tanabuba idaktsü, koba pa indang goal tanabuba asütsü.

Asaya atemtsü minute 7 lia, Werner melen Musiala moapu telungi aita asaya aser minute 83buba nung Musiala-i Dimitrievski adena Germany atema goal pezübuba inoktsü.

1910 sülen, Germany football putiotsü nung team atema goal idaktsür tanubusang rongnung Musiala kümogo. Arishi küm 18 ser anogo 227 nung Musiala-i iba jenjang ajanzüktetta liasü.

"Jamal-i tarendakba kecha mekai iba goal idaktsü aser pa den külem zünger asayar aikati iba ama asayaba mengudang," ta Flick-i ashi.

Australian Open metenzükdang vaccine agiadok tajungba: Sports Minister Martin

Melbourne, Mongputeni/October 12, 2021 (Agencies): Melbourne Park kübok ayonga asayatsü aliba Australian Open nung shilem agitsü bilema alir tennis asayartemi, iba Grand Slam nung tokteptsü maongka angutsü atema COVID-19 vaccine ajem agiadoktsüla, ta sangdong ka ajanga Australia Sorkar ketdangsür kati metetdaksü.

Victoria state nung, athlete takotet ajak vaccine ajem agitsü nungdaker, saka bendanglen mesüra Australia kübok tanga state nungi arur athlete tem vaccine agitsü mesüra magitsü atema tekolakpur ajanga osang tejangja ka agütsütsü.

Victoria indang sports minister Martin Pakula-i, athlete temi akok tashi tekümdangtsü meratem agitsüla, ta tetuyuba agütsü.

"Ni ATP mesüra WTA asayar ka süra, nibo vaccine agiadoktsü," ta Pakula-i ashi.

"Athlete temi angateta vaccine agiadokra, ibaji ajanga nüburtem asoshi tenokdangba kangarabo mekai Australian Open asayamung meraketa aser takok ngua ayonga asayatsüsa asayartemi maongka angutsü," ta pai ashi.

Women's WTA aser men's ATP tour anapronglai asayar ajak dang Covid-19 vaccine agitsü asoshi ajungshiogo, ajisüaka, Australian Open final takok angur (tebur) Novak Djokovic, shibai vaccine agitsü tetuyuba

anema nokdaker, pa densema asayar aikati vaccine agitsü tetuyuba nung anidaktsü memolunger.

Tennis Australia, koba ajanga Grand Slam asayamung ayonger, iba tentet yagi sangküm January ita asayartem atema ano osang tejangja ka magütsü.

Vaccine (dose anaprongla) agiadoker alir asayartem maongka tajungba angutsü aser Australia tonga arudang anogo 14 quarantine' nung madentsü imlar.

Non-resident tem Australia-i arutsü tenokdangba agüja lir aser Pakula-i ashiba agi, sangküm January 17 nung Australian Open tenzükbba mapang vaccine magirtem arutsü melatsü asoshi ano telemtetba magii lir.

"Iba tebilemstüji tongtibang asütsü, koba national cabinet aser federal cabinet tsüngda olemteptsü ama ni temolung melemi bilemer," ta pai ashi.

"Australian Open dak sendakba tzüzüng-ozüng atema, onoki Tennis Australia aser department of health naprongla den jembishinüdar," ta pai shisem.

Victoria nung taintem shilem 70 tashi vaccine dose anaprongla agir sülen ang iba yimti nung lockdown tenokdangba kar salatsü, koba ketdangsür sangdong ajanga October ita tatem tashi nung iba maparen tembanga inyaktsü imlar.



New Delhi, Mongputeni/October 12, 2021: Mongolbarnü, Jawaharlal Nehru Stadium, New Delhi kübok ayongba 3rd National 300M Championships nung, Associate Vice President of Athletics Federation of India, Abu Metha, alakteta tejaoker ama denogo aser national level nung takok angurtem nem pai medal agütsüogo. Iba mapang, Metha-i Indian Olympic Association, Secretary General, Rajeev Mehta den ajurutepa liasü aser; Nagaland aser North East nung saisapong atema asalentong aser iba wadang ajungkettsütsü onük balala nung tena sensaksemogo.

BILEMDANGANG

"Nisung ka taküm kümzüksü alitsübaji ajak asoshi tongtibang."